

# **ESPAINIAREN ERRET AKADEMIAK ESPAINIAKO GOBERNUBURUA DEN FELIPE GONZALEZ JAUNARI EGINDAKO GUTUNA DELA ETA EUSKALTZAINDIAREN**

## *adierazpena*

Euskaltzaindiak gaur egin duen hileroko batzar arruntean, beste gai batzuen artean, Espainiaren Erret Akademiak Espainiako Gobernuburua den Felipe González jaunari berriki bidali dion gutuna erabili du, eta honako *adierazpen* hau onartu du aho batez:

1. Hizkuntzaren eskubideen zaintzea bere eginkizunen artean duen gure Akademia honek harrিতua eta kezkatua agertu behar du gutun horren edukiagatik. Izan ere, gutunak ez du aintzat hartzen demokrazia berriz eratu zenez gero indarrean dagoen legeria, Euskal Herriko Autonomi Elkarteetan eta Nafarroako Foru Elkarteetan hizkuntza propioa den euskarari datxekola.

2. Hizkuntza propioa duten Autonomi Elkarteetan gaztelania bultzatzeko neurriak eskatzen dituen Akademiaren gutun honek eta beste izkribu askok euskararen mendeetako zokoratzea eta baztertzea ahazten dute, eta ez dute kontuan hartzen gure mintzairak era guztietako eragozpen eta debekuak jasan dituela. euskal gizartean eskubide osoz izan behar duen tokia erdietsi ezinik.

3. Nabarmena da euskarak ez duela mugaz honunzko Euskal Herrian erdararen maila inondik ere lortu, nahiz azken urteotan urrats handiak egin dituen. Ezjakinak bakarrik uka dezake gizarteko alor guztietan den desoreka. Estatuaren hizkuntza ofizialak erabateko nagusitasuna du horietan. Euskalduna da maiz aski arrotza bere lurraldean, dagozkion hizkuntz eskubideez ezin baliatuz.

4. Beharrezko dirudi berriro esateak ezen, lau probintziei dihoakienez, gaztelania ez dagoela inondik ere arriskuan, zeren egin den anitz ikerlan arras fidagarritan agerian jarri baita gaztelania hobeki ezagutzen dutela hezkuntza sistemako zenbait mailatako ikasle euskaldunek, ezen ez gaztelania bakarrik dakitenez.

5. Hizkuntza propioa duten Autonomiek haren alde dagiten lanaz gain, ezin ahantz daiteke Estatuaren bizkar dagoen erantzunkizuna, zeinek abian ipini behar baititu bortizki, orainarteko jardun hutsalen eta urrats lotsatien gaidik, gaztelaniaz beste hizkuntzak suspertzeko neurriak, bere ardurapeko eremuetan. Biziki nahi genuke hizkuntza hauek leku egoki bat izan lezaten, batez ere Estatuaren komunikabideetan eta berorren gainerako administrazioetan.

6. Euskaltzaindiak berriro dio prest dagoela ahaleginak egiteko elkarrekin bake-  
-giroan bizitzeko eta pertsonen eta herrien faboretan elkarlanean aritzeko, ezjakintasu-

nak dakartzan egoera deitoragarriak gaindituz eta Espainieraren Erret Akademiaren gutunak 2. puntuan dioen "Espainiako hizkuntza guztiekiko hiritar guztien jarrera leiala" sustatuz.

Bilbon, 1994ko azaroaren 25ean